

distis signa, sed quia comedistis panes illos, & saturati estis. Johan. 6. 26. Itaq; postea cum audirent, solos à patre tractos, quibus datum est, venire ad Christum, pedem retulerunt. *ψ. 44. 65. 66.* Qualis fuisse videtur & Demas, qui derelicto Paulo in vinculis, amplexus præsens seculum, profectus est Thessalonicam. 2. Timoth. 4. *ψ. 10.*

XLIII.

Contrarium omnino patet in sancto Mose, de quo Hebræ. 11. 25. expressè scribitur, *quod per fidem, iam grandis factus, renuerit vocari filius filia Pharaonis: potius eligens simul malis effici cum populo DEI, QUAM TEMPORARIIS COMMODIS, PECCATIS FRUI* (*ἢ πρόσκαιρον ἔχειν ἀμαρτίας ἀπόλαυσιν*) ubi vox *προσκαιρον*, manifestè commodum temporarium significat. *Maiores enim arbitratus est divitias probrum (id est crucem) Christi, quàm Aegyptiorum thesauros. Intuebatur enim (videlicet Fide) in præmiis largitionem, hoc est, in vitæ æternæ promissionem, ac remunerationem gratuitam.*

XLIV.

Sic nec vero, sinceròve corde hoc alterum Auditorum Evangelii genus amplectitur Evangelium, licet cum gaudio & statim sermonem accipiant. Nec enim radicem habent, sed Fidei duntaxat adumbratam quandam speciem obrinent, sitam in cognitione, nec in corde veraciter fundatam, qualis est hypocritarum, Fidem præ se ferentium, de quibus Job. 8. 14. *Sicut tela araneorum (inquit) fiducia hypocrite. Super acervum petrarum radices ejus densabuntur, & inter lapides commorabitur: si absorberit eum de loco suo, negabit eum, & dicet, Non novi te, &c. ψ. 17. 18.*

XLV.

Exemplo est Simon Magus, Acto. 8. 13. qui & ipse videns miracula, credidisse dicitur: sed fide adumbratâ, non salvificâ; quippe cujus cor non erat rectum in conspectu DEI; quo nomine Petrus, *Video, (inquit) te in felle amarissimo* (perverissimæ doctrinæ, Deutero. 29. 18. Hebr. 12. 15.) *& in nexu injustitiæ positum esse,* (quoad vitæ impuritatem, & cor ad avaritiam exercitatum) *ψ. 23.*

XLVI.

Itaq; baptizatus quidem apud Philippum perduravit: (ad tempus videlicet) tamen quo fine, & animo perduravit, satis manifestat, cum dona Sancti Spiritus empta vellet pecuniâ (quæ denuò scilicet divenderet majore precio, seq; inde magnificaret) vnde Petrus ei dixit: *Argentum*